

孟子趙注

盡心章句上

孟子卷第十三

趙氏注

盡心者人之有心爲精氣主思慮可否然後行之猶人法天天之執持維綱以正二十八舍者北辰也論語曰北辰居其所而衆星共之心者人之北辰也苟存其心養其性所以事天也故以盡心題篇

孟子曰盡其心者知其性也知其性則知天矣

性有仁義禮智之端心以制之惟心爲正人能盡極其心以思行善則可謂知其性矣知其性則知天道之貴善者也

存其心養其性所以事天也

能存其心養育其正性可謂仁人天道好生仁人亦好生天道無親惟仁是與行與天合故曰所以事天

殀壽不貳脩身以俟之所以立命也

貳二也仁人之行一度而已雖見前人或殀或壽終無二心改易其道殀若顏淵壽若邵公皆歸之命脩正其身以待天命此所以立命之本也

章指曰盡心竭性足以承天殀壽禍福秉心不違立命之道惟是爲珍

孟子曰莫非命也順受其正

莫無也人之終無非命也命有三名行善得善曰受命
行善得惡曰遭命行惡得惡曰隨命惟順受命爲受其
正也

是故知命者不立乎巖牆之下盡其道而死者正命也
知命者欲趨於正故不立巖牆之下恐壓覆也盡脩身
之道以壽終者爲得正命也

桎梏死者非正命也

畏壓溺禮所不弔故曰非正命也

章指曰人必趨命貴受其正巖牆之疑君子遠之

孟子曰求則得之舍則失之是求有益於得也求在我者

也

謂脩仁行義事在於我我求則得我舍則失故求有益於得也

求之有道得之有命是求無益於得也求在外者也

謂賢者脩其天爵而人爵從之故曰求之有道也脩天爵者或得或否故言得之有命也祿爵須知己知己者在外非身所專是以云求無益於得也求在外也

章指曰爲仁由己富貴在天故孔子曰如不可求從吾所好

孟子曰萬物皆備於我矣反身而誠樂莫大焉

物事也我身也普謂人爲成人已往皆備知天下萬物
常有所行矣誠者實也反自思其身所施行能皆實而
無虛則樂莫大焉

強恕而行求仁莫近焉

當自強勉以忠恕之道求仁之術此爲最近

章指曰每必以誠恕己而行樂在其中仁之至也

孟子曰行之而不著焉習矣而不察焉終身由之而不知
其道者衆也

人皆有仁義之心日自行之於其所愛而不能著明其
道以施於大事仁妻愛子亦以習矣而不能察知可推

以爲善也由用也終身用之以爲自然不究其道可成
君子此衆庶之人也

章指曰人有仁端達之爲道凡夫用之不知其爲寶也
孟子曰人不可以無恥

人不可以無所羞恥也論語曰行己有恥

無恥之恥無恥矣

人能恥己之無所恥是爲改行從善之人終身無復有
恥辱之累也

章指曰恥身無分獨無所恥斯必遠辱不爲憂矣

孟子曰恥之於人大矣爲機變之巧者無所用恥焉

恥者爲不正之道正人之所恥爲也今造機變穿陷之巧以攻戰者非古之正道也取爲一切可勝敵也宜無以錯於廉恥之心

不恥不若人何若人有

不恥不如古之聖人何有如賢人之名也

章指曰不慕大人何能有恥是以隰朋愧不及黃帝佐齊桓以有勲顏淵慕虞舜仲尼歎庶幾之云

孟子曰古之賢王好善而忘勢

樂善自卑若高宗得傳說而稟命

古之賢士何獨不然樂其道而忘人之勢

何獨不然何獨不有所樂有所忘也樂道守志若許由洗耳可謂忘人之勢矣

故王公不致敬盡禮則不得亟見之見且由不得亟而況得而臣之乎

亟數也若伯夷非其君不事伊尹樂堯舜之道不致敬盡禮可數見之乎作者七人隱各有方豈可得而臣之章指曰王公尊賢以貴下賤之義也樂道忘勢不以富貴動心之分也各崇所尚則義不虧矣

孟子謂宋句踐曰子好遊乎吾語子遊人知之亦囂囂人不知亦囂囂

宋姓也句踐名也好以道德遊欲行其道者囂囂自得無欲之貌

曰何如斯可以囂囂矣

句踐問何執守可囂囂也

曰尊德樂義則可以囂囂矣

尊貴也孟子曰能貴德而履之樂義而行之則可以囂囂無欲矣

故士窮不失義達不離道窮不失義故士得己焉達不離道故民不失望焉

窮不失義不爲不義而苟得故得己之本性也達不離

道思利民之道故民不失其望也

古之人得志澤加於民不得志脩身見於世窮則獨善其身達則兼善天下

古之人得志君國則德澤加於民人不得志謂賢者不遭遇也見立也獨治其身以立於世間不失其操也是故獨善其身達謂得行其道故能兼善天下也

章指曰內定常滿囂囂無憂可出可處故云以遊脩身立世賤不失道達善天下乃用其寶句踐好遊未得其要孟子言之然後乃喻

孟子曰待文王而後興者凡民也若夫豪傑之士雖無文

王猶興

凡民無異知者也故須文王之大化乃能自興起以趨善道若夫豪傑才知千萬於凡人者雖不遭文王猶能自起以善守身正行不陷溺也

章指曰小人待化乃不邪辟君子特立不爲俗移故稱豪傑自興也

孟子曰附之以韓魏之家如其自視歆然則過人遠矣附益也韓魏晉六卿之富者也言人既自有家復益韓魏百乘之家其富貴已美矣而其人歆然不以足自知仁義之道不足也此則過人甚遠矣

章指曰人情富盛莫不驕矜若能歛然謂不如人非但免過卓絕乎凡也

孟子曰以佚道使民雖勞不怨

謂教民趨農役有常時不使失業當時雖勞後獲其利則佚矣若亟其乘屋之類也故曰不怨

以生道殺民雖死不怨殺者

謂殺大辟之罪者以坐殺人故也殺此罪人者其意欲生民也故雖伏罪而死不怨殺者

章指曰勞人欲以佚之殺人欲以生之則民無怨讟也孟子曰霸者之民驩虞如也王者之民皞皞如也殺之而

不怨利之而不庸民日遷善而不知爲之者

霸者行善恤民恩澤暴見易知故民驩虞樂之也王者道大法天浩浩而德難見也殺非不教故殺之人不怨也庸功也利之使趨時而農六畜繁息無凍餓之老而民不知獨是王者之功脩其庠序之教使日遷善亦不能覺知誰爲之者言化大也

夫君子所過者化所存者神上下與天地同流豈曰小補之哉

君子通於聖人聖人如天過此世能化之存在此國其化如神故言與天地同流也天地化物歲成其功豈曰

使成人知其小補益也

章指曰王政皞皞與天地同道霸者德小民人速覩是以賢者志其大者也

孟子曰仁言不如仁聲之入人深也

仁言政教法度之言也仁聲樂聲雅頌也仁言之政雖明不如雅頌感人心之深也

善政不如善教之得民也

善政使民不違上善教使民尚仁義心易得也

善政民畏之善教民愛之善政得民財善教得民心

畏之不逋怠故賦役舉而財聚於一家也愛之樂風化

而上下親故歡心可得也

章指曰明法審令民趨君命崇寬務化民愛君德故曰移風易俗莫善於樂

孟子曰人之所不學而能者其良能也所不慮而知者其良知也

不學而能性所自能良甚也是人之所能甚也知亦猶是能也

孩提之童無不知愛其親者及其長也無不知敬其兄也孩提二三歲之間在襁褓知孩笑可提抱者也少知愛親長知敬兄此所謂良能良知也

親親仁也敬長義也無他達之天下也

人仁義之心少而皆有之欲爲善者無他達通也但通此親親敬長之心推之天下人而已

章指曰本性良能仁義是也達之天下恕乎己也

孟子曰舜之居深山之中與木石居與鹿豕遊其所以異於深山之野人者幾希

舜耕歷山之時居木石之間鹿豕近人若與人遊也希遠也當此之時舜與野人相去豈遠哉

及其聞一善言見一善行若決江河沛然莫之能禦也

舜雖外與野人同其居處聞一善言則從之見一善行